

# Te Guijtz Lo Rebeñ Efesios

**Bacuaa Pabl lo rebeñ guidoo  
neñ guedx Éfeso**

**1** Narä, Pabl, nacä apost xten Jesucrist sa'csi si'c rlajz Dios. Cacuaä guijtzre loj rebeñ nani huililajz xtiidxni, loj reni rujn si'cpac rniini neñ guedx Éfeso. <sup>2</sup>Xca'tu yälracnäy, yälrbedxi lajz xten Xtadnu Dios, näjza xten Dad Jesucrist.

**Rusule' Pabl xtidx Jesucrist**

<sup>3</sup>Rliä'pnu xpala'n Dios, Dad näj Xtad Jesucrist. Dios racnäy nuure, xcuent Crist runiidxni guiraa reyälracnäy xca' lastoonu, astoo yu'lanu xhaguibaa. <sup>4</sup>Laani gule nuure, che gajdlı guirixtiej guedxliujre, te gacnu xpejñni, te guibanñayanu nez lojni con yälrinälajz. <sup>5</sup>Sigajcza anungäjł xca'ni nuure te gacnu si'c xi'npacni sa'csi abiääd Jesucrist te guslaani nuure neñ dojl, si'c ni gunibee Dios sa'csi balaslajzni nuure. <sup>6</sup>Gucnäy Dios nuure te guiliä'pnu xpala'n Dios, sa'csi lagajc laani acua'ni nuure, abejñni nuure tejsi con xi'nni ni sanälajzni. <sup>7</sup>Laani baslaani nuure neñ dojl xcuent xtiejñni, laani badzucajni xtojłnu xcuent

xcälruslaslajzni <sup>8</sup>nani banidxduxhni loonu. Guideb yälñajn, guideb xcäriejn <sup>9</sup>basule'ni loonu xhigab xhiga'tzni xcuent redzuun ni rlajzni gunni, xhigabza ni bejñni galooli. <sup>10</sup>Luxh sidzujñ dxej sisiojbpac xhigab ni bejn Dios. Che guidzujñ dxejga sutojp Dios guiraali, sudeedni guinibee Jesucrist guira'ti ni yu' xhaguibaa, sigajc recos ni yu' lo guedxliuj.

<sup>11</sup>Arajpnu te xcälñasa'c Jesucrist, sa'csi galooli bejn Dios xhigab guniidxni yälñasa'cga. Lagajc Dios benchee guira'ti ni yu', luxh rujnpacni nani abejñni xhigab najc laaca gunni <sup>12</sup>te guiliä'p bejn xpala'n xcälñibeeni xcuentnu, nani ganiddoo biolilaaaznu xtidx Jesucrist. <sup>13</sup>Näjza la'tu, che biejn diajgtu redidx guliı, rediidx ni ruslaa beñ lo dojl, dxejc huililajztu xtidx Jesucrist, dxejc gujczatu tejsi con laani. Dxejc cua'tu Sprit Dxan xten Dios, ni'c najc si'c seen ahuililajztu, si'cni bia'n Dios diidx. <sup>14</sup>Baniidx Dios Sprit Dxan xtenni te cuääzni neñ lastoonu, te ni'c najc seen xca'nu yälñasa'c nani guniidx Dios che abaluuxni xtzuunni, nalajznu guslaani guiraa rexpejñni te guiliä'preni xpala'nni lo xcälñibeeni.

**Rniab Pabl gudeed Dios  
yálnajn loj renani ahuililajz**

<sup>15</sup>Ni'cni nájza nará, sa'csi abiejn diagá xho rililajztu xtidx Dad Jesucrist nájza xho sanälajztu guiraa rexpejn Jesucrist, <sup>16</sup>dina gusaná gudedá xquixtios lo Dios xcuent la'tu. Rnaduxh lazä la'tu che rniabä lo Dios. <sup>17</sup>Rniabä lo Xtios Dad Jesucrist, xtdadni ni rnibee xhaguibaa, guniidxni lojtu te yálnanduxh, te yälrluiloj recos xhiga'tz te gacbeduxhrutu xcuent Gueb Dios. <sup>18</sup>Rniabäza lo Dios jianij xcäriejntu te gacbeetu xhini'c najc speranz xten yälracrejdxtu lo xtiidxni, te gacbeetu lacti saru, lacti sajc yálnasa'c ni gudeed Dios lo Jesucrist nájza loj rexpejn, <sup>19</sup>te gacbeezatu lacti gurobduxh najc yälrnibee nani rajpni nez loonu nani ahuililajz xtiidxni. Guiraa redee ruluu lacti nadip najc yälrnibee xten Dios. <sup>20</sup>Lagajc yälrnibeere bejn dzuun par Jesucrist. Con yälrnibeere baspajn Dios Jesucrist lo rebengut, te gurejni xladbee Dios cadro rnibeeni xhaguibaa. <sup>21</sup>Maazru sajcn lo chutis gubier, lo chutis yälrnibee, lo xhitis yálnadip, lo chutis ni rnibee; maazru sajcn lo chutis nani abibee te guinibee, sigajc naj, sigajc nen redxey ni churu jiääd. <sup>22</sup>Niluxh badeed Dios guira'tini ladznaa Jesucrist, laazani bejn bibee Jesucrist gunibeeni lo guiraa xhixten xquidooi. <sup>23</sup>Reben guidoore najc si'c tiejxh xten Jesucrist, luxh sigajc rudeed Dios guiralii loj Jesucrist, sigajcza rudeed Jesucrist guiralii loj rebejn ni najc xquidooi.

**Rusläa Dios nurnu sa'csi  
rinälajzni nurnu**

**2** Laani baniidxni yálnabajn lojtu che najctu si'c bengut nez loj Dios sa'csi rujntu dojl. <sup>2</sup>Galoo gubajntu lo dojl, entis lo xnez guedxliujre guzajtu, biutu xtidx bendxab nani rnibee guedxliujre. Sprit xtenni rujn dzuun nen lastoo rexi'nni nani di gucua diajg xtidx Dios. <sup>3</sup>Luxh galoo, naj nuure nadxaagnu lojreni, biennu si'c ni rlajz tiejxhnu. Dxejc biennu si'ctisni rlajz tiejxhnu, si'ctisni biajb xhigabnu. Nungäjil guidxe'ch Dios loonu, sigajc bidxe'chni loj guiraa reben guedxliuj. <sup>4</sup>Niluxh balaslajz Dios nuure. Con xcälsanälazduxhni huinälajzni nuure. <sup>5</sup>Mase anajcnu bengut lo dojl, laani baniidxni yálnabajn loonu. Rajpnu yálnabajnre con Jesucrist. Sa'csi balaslajzni nuure baslaani nuure nen dojl. <sup>6</sup>Baspansacni nuure con Jesucrist; sigajcza bejnni cuenäjn Jesucrist xhaguibaa, <sup>7</sup>te nen redxey ni churu jiääd, guluilojni lacti sajc xcälnasa'c xten yälrlulaslajzni, ni'c sanälajzni nuure, najcni huenduxh loonu por Jesucrist. <sup>8</sup>Sa'csi rulaslajz Dios nuure, ni'c baslaani nuure nen dojl che huililajznu xtiidxni. Luxh et sa'csi yu' xhi biennu; dee najc nani banidx-xlia' Dios loonu. <sup>9</sup>Xhet xcuent xhi dzunsa'cni ni biennu, te di chu tejtü gac nayedxlajzdi. <sup>10</sup>Dios najc ni benchee nuure. Sigajcza con Jesucrist bejnni gacnu bejn ni rujn dzunsa'c nani galooli agunibee Dios jienpacnu.

**Yälrbexdilajz ni rajpnu por Jesucrist**

<sup>11</sup>Ni'c colsnaj lajztu xho gujctu galoo. Ditu ni ajc rexpejn Israel.

Rniireni la'tu 'benzijt' sa'csi ditu chu bee si'c ru' rexpejn Israel. Sa'csi lagajc con naareni rusälireni bee. <sup>12</sup>Dxejc suga'tu ditu gumbee Jesucrist. Zijt yu'tu loj rexpejn Israel, najctu benzijt. Nicla gumbeetu rediidx ni bia'n Dios loj rexpejn Israel. Ditu niunloj gusläa Dios la'tu lo dojl, dizatu niembee Gueb Dios lo guedxliujre. <sup>13</sup>Niluxh naj ayu'tu lo Jesucrist, la'tu ni guyu' zijt lo Dios galoo. Naj agubigtu lo Dios sa'csi abia xtojltu con xtiejn Jesucrist. <sup>14</sup>Jesucrist najc ni rbecdxi lajznu. Laani bejn gujc rexpejn Israel tejsi con rebenzijt. Laani badzucajni redzuun xten leii te gujc rexpejn Israel tejsi con rebenzijt. <sup>15</sup>Lagajc con tiejxh Jesucrist ni gojl lo cruzj banijtni redzuun xten leii nani bejn bidxe'ch rexpejn Israel lo rebenzijt. Lagajc laani bejn bidxagsa'reni te gujcreni tejsi che huililajzreni xtiidxni, gujcreni te beccoob. Dxejc gulecdxini lajznireni. <sup>16</sup>Con yälgujt ni gujtni lo cruzj badzu'ni guiro'preni lo Dios te gujcreni tejsi. Si'c guläjz rdxechnäj sa'reni.

<sup>17</sup>Cajza lo gujtz rediidxre:  
Biäadni te basule'ni xho ga'p  
rebejn yälrbedxi lajz rebejn  
ni suga' zijt lo Dios näjza reni  
suga' gajxh lo Dios.

<sup>18</sup>Laani bejn sajc jiu' guiro'p cuaa bejn lo Dios con tejsi xhigab, näjza tejsi Sprit. <sup>19</sup>Ni'cni dirutu gac benzijt, bejn ni rut numbeedi. Anajctu tejsi con rexpejn, najczatu sa' rexpejn Dios. <sup>20</sup>La'tu najctu si'c te yuro. La'tu najctu si'c padeer xten yu'ga. Reapost näjza reprofet najc si'c cheni birixtiej

yu'ga. Jesucrist najc si'c guiro ni gusuj squiin yu'ga, guij ni sajcru, sa'csi Jesucrist rnibee. <sup>21</sup>Cayunsa'c Dios yu'ga, cayajc yu'ga con la'tu, caroobni te gacni xquidodxan Jesucrist. <sup>22</sup>Sigajcza la'tu näjza rexpejn Israel ni huililajz najctu tejsi con Jesucrist. Cagustioobtu guidooga te nenni cuääz Sprit Dxaan xten Dios.

**Pabl nungäjł chanä xtidx  
Dios lo rebenzijt**

**3** Ni'cni yu'ä nen latzguiib, narä, Pabl sa'csi cagusule'ä Jesucrist, te jädnää xtiidxni lojtu, najctu benzijt. <sup>2</sup>Pet abiejn diajgtu lacti hueen najc Dios baniidxni dzuunre loä, jädnää xtiidxni lojtu. <sup>3</sup>Dios baluini xhigab-xhiga'tzni loä (si'cni bacuaä lojtu galoo). <sup>4</sup>Che gołtu guijtzga, sacbeetu cati ananä rexhigabxhiga'tz xten Jesucrist. <sup>5</sup>Xhigab-xhiga'tzre di bejn niembee galoo, niluxh naj Sprit Dxaan xten Dios abaluinini loj reapost näjza loj reprofet. <sup>6</sup>Dee najc xhigab-xhiga'tzga: por rediidx xcuent Jesucrist ni rusläa bejn nen dojl rujn Dios gac reni najc benzijt tejsi con reni najc xpen Israel, guidxaag sa'reni, gacreni tejsi bejn. Guiro'preni xca' yäl'nasa'c si'c bia'n Dios diidx.

<sup>7</sup>Narä nacä te apost xten dzuun ni baniidxni, por xcäl'rulasajz Dios ni cuaxlia'ä. Dios baniidx dzuunre loä con xcäl'rnibeduxhni. <sup>8</sup>Luxh masä guxiiru sacä lo guiraa rexpejn, loä baniidxni xcäl'racnäjni te lo rebenzijt gusule'ä xtiidxni, nalajznu redidxcoob xcuent xcäl'nasa'c Jesucrist, <sup>9</sup>te gusule'ä lo guiraa

bejn rexhigabxhiga'tz nani bacua'tz Dios lojnu galooli. Dios benchee guiralii ni yu'. <sup>10</sup>Si'c gujc te naj jien guiralii yälñanduxh xten Dios. Reni najc xpejn pacni neñ xquidooi guluui yälñajnre lo rexangl Dios, loj reni rnibee xhaguibaa. <sup>11</sup>Galooli bejn Dios xhigabre par tejpas, ni'cni biääd xtadnu Jesucrist te guzojb xhigab ni bejn Dios. <sup>12</sup>Con Jesucrist dinu guidxejb guibignu, guiniabnu lo Dios sa'csi ahuililajznu xtiidxni. <sup>13</sup>Na'c gac-huin lajztu sa'csi cadedä trabajw xcuentu. Colguibalajz; dee najc xcälñasa'ctu.

#### Xcälñanalajz Jesucrist

<sup>14</sup>Ni'cni ruzuxhibä nez loj Xtad Dad Jesucrist <sup>15</sup>nani badeed lajni lo guiraa reni yu' xhaguibaa näjza reni yu' lo guedxliuj, <sup>16</sup>rniabä loj Dad xhaguibaa gutijpni lastootu con yälrnibee xcuent Sprit Dxan xtenni, sa'csi yuduxh xcälñasa'cni lo xcälrdimbicha'ni xhaguibaa. <sup>17</sup>Rniabäza lo Dios te jiädälajz Jesucrist neñ lastootu sa'csi ahuililajztu. Te che agusudzu'tztu, agusutijptu lo yälñanalajz <sup>18</sup>dxejc sajc gacbeetu sigajc guiraa rexpajn pacni lacti gulajg, lactiza siool, lacti jiät, lactiza jiaa najc yälñanalajz xten Jesucrist. <sup>19</sup>Te gumbeezatu xcälñanalajz Jesucrist ni najc gurobduxhtej, digacdi guichalonuni. Te chaza lastootu, näjza xcäriejntu con guiraa rexcälñasa'c Dios.

<sup>20</sup>Dios rnibeduxh. Sajc gunidxduxhruni loj xhitis ni rniabnu lojni, loj recos ni riennu xhigab. Con Sprit Dxan ni rujn dzuun neñ lastoonu suniidxni

reyälñasa'c. <sup>21</sup>Loj Diosre coldeed xquixtios. Colguiliä'p xpala'nni nen guidoo xcuent Dad Jesucrist guira dxej, par tejpas. Sugacni si'c.

#### Por Sprit Dxan nadxaag sa'nu

**4** Narä yu'ä lojtis Jesucrist te rsule'ätis xtiidxni. Ni'cni rniabä lojtu, guibajntu si'cni nungäj, si'cni bejnzatu xhigab cheni gurejdxni la'tu. <sup>2</sup>Colguibajn con yälñalajz, näjza yälñadolajz, colcuedcxi lajztu. Colyujn huant resa'tu con yälñälajz sa'ni. <sup>3</sup>Colhuii te guidxaag sa'tu gactu tejsi con Sprit Dxan ni ruscuedcxilajztu. <sup>4</sup>Si'c tejsi tiejxh najcnu loj Jesucrist, tejsiza najc xhigabnu con laani, tejsiza najc yälñrunloj ni rajptu xcuent diidx nani gurejdxtu. <sup>5</sup>Rajptu tejsi Dad, tejsi yälñrililajz, tejsi yälñrobnis, <sup>6</sup>tejsi Dios, tejsi Xtad guiraanu nani rnibee guira'ti lo guiraanu. <sup>7</sup>Lo tejganu abaniidxni dzuun si'tctis bejn Jesucrist xhigab guiniidxni lo tejganu. <sup>8</sup>Ni'cni caj lo reguijtz:

Che huä'pni xhaguibaa, cadre rnibeeni,  
 abejnni gaan loj guiraa yälñrnibee,  
 dxejcti badeedni dzuun lo rexpajn ni lo guedxliuj.

<sup>9</sup>¿Xhi säloj cadre caj, “huä'pni”? Dee säloj ganid biäjtni maazru jiät lo guedxliuj. <sup>10</sup>Lagajc nani biäjtgä, lagajc laani huä'pni jiaaru lo guiraa rexhaguibaa te sajc guinibeeni guibaa näjza guedxliuj. <sup>11</sup>Lagajc laani badeedni xtzuum tejegareni. Yu'reni badeedni gac apost, yu'reni badeedni gac profe't, gaiireni

badeedni gusule' xho ruslaa xtiidxni bejn lo dojl, sgaiireni badeedni gac si'c ni ga'p reben guidoo, sgaiireni badeedni guluii rexpejn. <sup>12</sup>Guiraa redee badeedni te guluiireni rexpejn Jesucrist, te gunreni dzuun te gustajlreni rebejn ni gac xquidoo Jesucrist. <sup>13</sup>Nungäjł gac dzuunre che guidzujnli dxej ni nadxaag-sa'nu guiraanu loj yälrlililajz, che guidzujnli dxej riembesa'cnu Xi'n Dios, dxej anajcnu benguyajł lo xtiidxni, si'c te ni aguroob loj xcälrnibee Jesucrist. <sup>14</sup>Dirunu gac si'c rebiiux ni tera'tsi rusiejch lajzni, rucuaadijgreni xtidx chutis bejn, mase xhitis diidx ruluiini. Dxej riabreni lo redidx-xhii xten bejn nani rusguee, nani cabäjztis gusguee bejn. <sup>15</sup>Maazru huen chonuunu loj redidxlii xten Jesucrist con yälrlinälajz te tioobnu lo guiraa recos xten nani rnibee, lagajc Jesucrist. <sup>16</sup>Loj Jesucrist nazdzu'tz guiraa rexpejn, te si'cni nazdzu'tzsa'reni sääreni, najcreni tejsi loj tiejxh Jesucrist, racnäy sa'reni segun xhi dzuun rujn tejpgareni, caseiedruren te cayajc xhidajłru rebejnğa con yälsanälajz.

#### Te yäl\_naba\_ncoob con Jesucrist

<sup>17</sup>Laa ni'cni rniä rniabäza con laj Dad Jesucrist na'cru guibajntu si'c nabajn rebejn nani di gumbee Dios. Laareni rujn si'ctis ni riab yejcreni. <sup>18</sup>Nayääl xcäriejnreni, direni ga'p xcäl\_nabajn Dios sa'csi nadduxh lastooreni. <sup>19</sup>Redee che gucnajd xcäriejnreni gusloj bejnreni guiraloj yälrtujy, guiraa redojl ni di nungäjł gunreni. <sup>20</sup>Niluxh la'tu xhet si'cdi bisieedtu loj Jesucrist.

<sup>21</sup>Palga abiejn diajgtu xtiidxni, niluxh abaluiini lojtu didxlii ni siädnä Jesucrist, <sup>22</sup>colgusaan yäl\_nabanyujxh ni gojptu: Lo yäl\_nabanyujxhğa rujn bejn si'ctis ni rlajzni. Dxejcti si'c runijtni la'tu lo Dios. <sup>23</sup>Colgusiejch lajztu, colgusia xcäriejntu, <sup>24</sup>te gactu be\_ncoob nani bejn Dios, colchanuu te yäl\_nabansa'c, te yäl\_nabanya xten xtidxliini.

<sup>25</sup>Colguuro'n diidx-xhii, colnii didxlii lo resa'tu sa'csi tejsi najcnu guiraanu.

<sup>26</sup>Che guidxe'chtu, na'c guntu dojl. Na'c gusaantu chu xcälrdxe'chtu guideb dxej che chääzli gubijdx. <sup>27</sup>Na'c gusaantu jiu' bendxab nen lastootu.

<sup>28</sup>Nani rilajn, na'cru cuanni. Laaca gunni dzuun con naani te gunni te dzunsa'c nani gudeed meel lojni te gac gacnäyzani rebejn nani xhet rajpdı.

<sup>29</sup>Na'c gusaantu guirii nicla tej didxguijdx ro'tu. Colnii ganax didxa'c te gacnäjni guisieed reni rucuaadijg xtiidxtu. <sup>30</sup>Na'c guntu gac-huin lajz Sprit Dxaan xten Dios. Laani najc te seen xten Dios najctu xpejn Dios, ni'c rbäjzni nen lastootu che guidzujnli dxej ni chäätu lo Dios.

<sup>31</sup>Colguuro'n yäl\_naba\_ndxuudx xtentu, näy yälrdxe'ch, näy yälrdxagdił sa'ni, näy yälrbedxa', näy yälrgue. Colguibicaj lo guiraa redojlğa, na'c gactu benguijdx.

<sup>32</sup>Nungäjł gactu huen loj resa'tu, colgulasajz resa'tu, colsiäjł lajztu con resa'tu ni rujn dojl lojtu si'c rsiäjł Dios lajzni rextojłtu xcuent Dad Jesucrist.

### Xho nanab guibajñ rexi'n Dios

**5** Colguibajñ si'c nabajñ Dios, sa'csi najcti xi'nni nani sanälajñi. <sup>2</sup>Colchasanäj yälsanälajz sigajcni huinälajz Jesucrist nuure cheni badeedni lagajc laani lo Dios, cuajni lo crujuj, gujtni. Laani gujcni si'c gojn, gujczani yälrbibyaal ni bidxagajz Dios.

<sup>3</sup>Nicla gusä'ttu yälrusguee chääl bejn, nicla redoł dxuudx, niclaza yälsanälaztej xhixtentisni. Nicla gusä'ttuni lo sa'tu, sa'csi xhet si'cdi nungäjł gun bejn ni naban-naya. <sup>4</sup>Sigajcza colcuälaz diidx ni rujn xtujy, näjza didxnajd, näjza didxnaj nani digac laaca. Colgudeedtis xquixtios lo Dios. <sup>5</sup>La'tu anajntu nicla tej ni rusguee chälbejn, nicla tej bendxuudx, nicla tej ni sanälaztej xhixtentisni, nicla renani rajñ rebanäjb, nicla tej reni'c di xca' yäl'nasa'c loj Jesucrist, dizareni jiu' lo xcäl'rnibee Jesucrist, xcäl'rnibee Dios. <sup>6</sup>Na'c gusaantu gusguee bejn la'tu con diidx ni xhet sajcdi sa'csi xcuent redzuunga riääd xcäl'rdxe'ch Dios loj rebejn ni di gusoob xtiidxni. <sup>7</sup>Na'c guntu sigajc rujnreni.

<sup>8</sup>Galoo nacäjyjtis xcäriejntu gubajntu, luxh naj abasanij Jesucrist xcäriejntu. Colguibajñ si'c nungäjł guibajñ nani abianij xcäriejnñi. <sup>9</sup>Sa'csi nani abianij xcäriejnñi rujn dzunsa'c, rniini didxgulii. <sup>10</sup>Colguisieed xhini'c rchagajz Dios. <sup>11</sup>Na'c guntu redzundxuudx nani rujn reni nacäjy xcäriejnreni, coltilnäj reni rujn sa' dzunguijdxga. <sup>12</sup>Sa'csi te xtujyli najc jieinu diidx xcuent xtzunreni ni runxhiga'tzreni. <sup>13</sup>Niluxh guiraa

sa' redzuunre ni rdilnäjnu, huenliisi sien xhi najcreni, suzenni lo xpianij Jesucrist. Sa'csi guira'ti ni ruzen najc nianij. <sup>14</sup>Ni'cni caj loj reguijtz, räjp Dios:

Gubajñ, huistie luj ni rejslu.

iHuistie lo dojl, luj ni naga'lu lo dojl si'c bengut,

te gusanij Jesucrist xcäriejnlu!

<sup>15</sup>Colhuii, colsin, na'c guibajntu si'c te bejn nani di gacbee, colguibajñ si'c bejn nani yu' xcäriejnñi. <sup>16</sup>Coltedsa'c redxej sa'csi nen redxejre ganax cosguijdx rujn bejn. <sup>17</sup>Ni'cni na'c guibajntu si'c rebejn nani di gacbee, colyacnasin, te gacbeetu xhini'c najc ni rlajz Dad xhaguibaa guntu. <sup>18</sup>Lacuaa yätu nejp nani runijt bejn, colgapchee Sprit Dxan xten Dios nen lastootu. <sup>19</sup>Colnii loj resa'tu rediidx nani gunii rebejn tiemp gulä'preni xpala'n Dios, colyelza redij xten Dios, con reyälriel colguiliä'p xpala'n Dios nen lastootu. <sup>20</sup>Di jiał lajztu gudeedtu xquixtios lo Dios xtdadnu con laj Dad Jesucrist.

### Xho guibannäj sa' rexpejn Jesucrist

<sup>21</sup>Sa'csi rajntu Jesucrist, colgusoob xtidx sa'tu.

<sup>22</sup>Lojtu, regunaa ni abachnaa, rniä scree: Colgusoob xtidx chäältu si'c rusoobzatu xtidx Dad Jesucrist.

<sup>23</sup>Sa'csi niguii rnibee gunaa si'cni rnibee Jesucrist xquidooni, niluxh laazani ruslaani rexpejn guidooni lo redojl, najcreni si'c tiejxhni. <sup>24</sup>Ni'cni, sigajc rusoob reben guidooga nani rnibee Jesucrist gunreni, sigajcza nungäjł gusoob regunaa ni abachnaa nani guinibeetis chälreni gunreni.

<sup>25</sup>Lojtu, reniguii ni abachnaa rniä scree: Colchanälajz chäälto sigajc ni huinäälajz Jesucrist rexpén guidooni, badeedni lagajc tiejxhni loj Dios cheni cuajni lo crujuj por laareni <sup>26</sup>te basiani xtojl rexpéjn guidooni, te gujcreni te beñcoob, abidiib lastooreni con xtiidxni si'c rdiib te cos con nis <sup>27</sup>te che xca'ni rexpén guidooni, najcreni te guidoo ni sajrcu, te guidoo nani xheti xtojl'ni, te guidoo nani sugadzu'tz, te guidoo xhet xhi riäädxdí, najcni te guidoya, xheti xhi xtojldini. <sup>28</sup>Sigajcza, te niguii nani abachnaa nungäjł chanälajz chäälni sigajc sanälajzni lagajc tiejxhni. Nani sanälajz chäälni sanälajz lagajc laani. <sup>29</sup>Ruti chu te bejn ni rbälaz tiejxhni; alga rajpni tiejxhni ruyaanni tiejxhni sigajc rajp Jesucrist rexpén guidooni. <sup>30</sup>Najczanu tejsi loj tiejxh Jesucrist, loj xpääl'ni, loj rextzujt'ni. <sup>31</sup>“Ni'cni che guchnaa te niguii rusa'n'ni xtadni, xnanni, te xca'ni gunaa, te gac guiro'preni si'c tejsi bääl, si'c tejsi bejn.” <sup>32</sup>Dee najc te diidx xhiga'tzduxh; li te “¿chuj?” najcni. Niluxh narä rniä xcuent Jesucrist con rexpénguidooni. <sup>33</sup>Niluxh nanabpac chanälajz teygatu chäälto sigajc sanälajztu tiejxhtu. Dxejcti gunaa ga'pzani xpala'n chääl'ni.

**6** Lojtu biuux, rniä scree: Colgucua diajg xtidx Jesucrist, colgusoob xtidx xtadtu sa'csi ni'c sajz nez loj Dios. <sup>2</sup>Colga'p xpala'n xtadtu, xnantu, sa'csi ni'c najc didx galoo xten leii nani runiidx xhi xca'tu palga gusoobtu diidxga; <sup>3</sup>“Te saruduxh guibajntu xchero lo guedxliujre.”

<sup>4</sup>La'tu, Dad ni najc guzajn, na'c guntu guidxe'ch rexi'ntu lojtu. Colguslaareni con yäl'naj, colgulijdxreni con xtidx Jesucrist.

<sup>5</sup>La'tu ni najc mos, colgusoob xtidx xlamtu lo guedxliujre, colcuadiajg xtiidxni, xhet xhi steedi xhigabdi guntu neñ lastootu. Colyejn xtzuumni si'cni najc xtzuum Jesucrist. <sup>6</sup>Colyejn xtzuumni, niluxh xhet che suga'tisreni, cahuiireni, parsi jiansa'ctu lojreni. Maazru hueen guntu dzuun si'c xmos Jesucrist; colyejn guira'ti si'cni rujntu xtzuumnactu; si'cni rñajz Dios. <sup>7</sup>Colyujn xtzuumni guideb lastootu si'c xmos Jesucrist, et si'c'di xmos beñ guedxliuj. <sup>8</sup>Anajntu dzunsa'c ni gun teygatu, lagajcza xcuent ni'c xca'tu loj Dad Jesucrist, mase najctu mos o mase rutlojdi yu'tu.

<sup>9</sup>Lojtu, relam, rniä scree: Sigajcza colyujn lojreni. Colgusaan yäl'rusacsí, sa'csi anajntu yu' xlamtu xhaguibaa, luxh tebloj najc guiraa rebejn nez lojni.

**Nani gacw rexpéjn Jesucrist lo guerr**

<sup>10</sup>Didx lult ni rniä, sa'ä, najc scree: Colsutijp lo xcäl'racnäj Jesucrist, col'sudzu'tz lo xcäl'nadip xcäl'rnibeeni. <sup>11</sup>Colgajcw xhabguiib xten Dios te gac sudzu'tztu lo reyäl'rusguee xten bendxab. <sup>12</sup>Sa'csi xhet beñ guedxliujtis cadil'näjnu. Cadil'näjzanu reguxhtis xte yäl'cäjy, näjza reyäl'rnibee, rebejn nani rnibee loj reyäl'cäjy, näjza rexangl bendxab nani rnibee bej xten guedxliujre. <sup>13</sup>Ni'cni colca' guideb lad-guiib xten Dios nani runiidxni loonu te gac sudzu'tznu neñ dxej ni guideednu trabajwduxh, te che



agudejdni, laltis sisiudzu'tznu.  
<sup>14</sup>Col̄sudzu'tz pues. Xque'tu  
 col̄guliib sindoor-guiib ni najc xtid̄x  
 Jesucrist, col̄gajcw gamangw-guiib  
 ni najc rextzunsac'c xten Dios ni  
 rujntu. <sup>15</sup>Col̄cuuaa gurach-guiib  
 ni'tu (ni'c najc xtid̄x Jesucrist ni  
 ruscuecdxi lajztu). <sup>16</sup>Col̄ca' escud-  
 guiib ni najc yäl̄rililajz te con  
 yäl̄rililajz xtid̄x Dios di beñdxab  
 gun gaan gusguee la'tu con rextid̄x-  
 xhiini. <sup>17</sup>Col̄ca' yäl̄ruslaa xten  
 Dios lo dojl̄ si'c te xhumbrel-guiib  
 chu yejctu; col̄ca'za lans xten  
 Sprit Dxan xten Dios ni najc xtid̄x  
 Dios. <sup>18</sup>Col̄nab lo Dios guiraa dxej;  
 col̄nab lojni con Sprit Dxan xtenni;  
 col̄susint̄is; na'c jieedtu guiniabtu  
 lo Dios xcuent guiraa xpejn̄ni.  
<sup>19</sup>Col̄nabza lo Dios por narä te  
 guniid̄x Dios diid̄x cheni gal̄ guiniä,  
 te na'c guidxebä guiniä che guluiä

did̄x-xhiga'tz xten yäl̄ruslaa bejn̄ lo  
 dojl̄. <sup>20</sup>Xcuent rediid̄xga ni yu'ä nen̄  
 latzguiib, caduä con caden̄. Ni'cni  
 col̄nab lo Dios te na'c guidxebä  
 guiniä rediid̄xga si'cpacni säbyäj̄l  
 guiniäni.

#### Lult xtixtios

<sup>21</sup>Niluxh te gabeetu xho sasaj  
 rextzunä, nägajcza xho yu'ä narä,  
 Tíquico, sa'nu ni sanälajznu, ni  
 runsa'cza xtzun Dad Jesucrist, siääd  
 lojtu te gusule'ni diid̄x. <sup>22</sup>Laapacni  
 ruxhaäl̄ä lojtu, te gabeetu xho  
 yu'nu, te si'c guscuecdxini lajztu.

<sup>23</sup>Rniabä yäl̄rbedxilajz par  
 resa'nu, näjza yäl̄rililajz con  
 yäl̄sanälajz xten Dios Xtadnu  
 näjza xten Dad Jesucrist. <sup>24</sup>Gacnäj  
 Dios guiraa reni di gusguee, reni  
 sanälajzpac Dad Jesucrist. Sugacni  
 si'c.